

## JERUSALEM AṬANGA BABULON



**CHÂNGVAWN:** “Tichuan, hêng tlangvâl palîte hi Pathianin lehkha thiamna leh finna zawng zawngah hriatna leh bengvârna a pê a; Daniela chuan inlârna leh mumang zawng zawng hriat thiamna a nei a,” (*Daniela 1:17*, NKJV).

**SABBATH CHAWHNÛ**

January 4

**Chhiar Tûr:** 2 *Lalte* 21:10–16; *Daniela* 1; *Matthaia* 16:24–26; 2 *Korin* 4:17; *Galatia* 2:19, 20; *Jakoba* 1:5.

**B**IBLE hian tlu tawh mihringte chak lohna chu tlang takin a târ lang mai a. *Genesis* 3 chinah hi chuan mihringte sualnate leh a nghawng ṭha lo tak chu târlan a ni zui ta zêl a. Chutih rualin, Pathiana rinna ropui tak lantîrtû, rinawm loh zâra thil eng emaw tak têl mai thei tûr ni sîte pawh târlan an ni bawk a. Chutianga rinawmna kawnga entawn tûr ṭha ber ber thenkhat chu Daniela bû-ah hian a chuâng hlawm a ni.

Chutih laiin, Daniela bû kan zir hian, hê bûin a fak leh târlan ber chu Pathian a ni zâwk tih hi hre reng ila. Daniela leh a ṭhiante rinawmna fak leh châwisân kan tumna lamah, khang tlangvâl palîte nun kaihuai leh tichaktu, Babulon Lalram chakna leh hîpna do theia Siamtu zâwk kha kan châwisâng lo fo mai. Mahnî ram leh hmun ngêia rinawm tûra chona hi a lian thei hlê a, ram dang, hnam dang nun leh sâkhaw biakna kârah phei chuan a khrih hlê ang. Mahse, khang mi ropuiten chona an hmachhawn theih chhan

chu, tirhkoh Paula ang khân, “an rina chu an hriat” (2 *Timothea* 1:12)a, Amah an rinchhan tlat vâng a ni.

**SUNDAY**

*January 5*

## **Pathian Thuneihna**

Daniela bû hi a tîrah chuan hneh nihnain a inñan phawt a. Juda lalram chu Nebukadnezzara laka tlâwmin, tempul bungbêlte pawh Jerusalem ațangin Shinar rama phurh a ni a. *Shinar* tih thû hi Bible-a *Genesis 11:2*-ah kan hmû a, chû chu Babêl Insâng sakna hmun kha a ni. *Shinar* chu ‘Pathian laka helna’ chhinchhiahna târlanna a ni. Khâng Babel Insâng satûte khân vân tawnga sak an tumnaah chuan lo hlawhchham ta mah se, pâwnlam lan dân mai ațang chuan, Shinar rama mî Nebukadnezzara leh a pathiante chuan Israelte Pathian thuthlung chu a hneh ta zâwk ni mai âwmin a lang.

Chuti chungin, Daniela bu bulțanna thil Chiang tak chu, Jerusalem hneh a nihna chhan kha Babulon lal thiltihtheihna chungnun vâng ni lo vin, “LALPA chuan Juda lal Jehoiakima chu a [Nebukadnezzara] kutah a pê,” (*Daniela 1:2*, NKJV) tiin a la sawi cheu a ni. A hmâ daihah, A mîten Amah an theihnghilh a thuthlung an bawhchhiat chuan, ram dang salah a la târtîr dâwn a ni tih a lo sawi tawh a. Chuvângin, Daniela khân Babulon sipai chakna piah lama vân Pathianin khawvêl chanchin inher chu a kaihrui a ni tih a hria a. Chutiang taka Pathian thuneihna hriatna zârah, hêng țhalaite hian Babulon lalrama thlêmna leh nawrna hmachhawn thei tûrin chakna leh phûrna an nei thei ta a n.

**Chhiar tûr: 2 Lalte 21:10–16, 2 Lalte 24:18–20, leh Jeremia 3:13. Engati nge Pathianin Juda leh Jerusalem chu Babulon mîte kutah a pêk?**

Hetia kum zabi 21-na huna chonate kan hmachhawn mêk lai hian, Daniela bûa Chiang taka târ a nih ang hian Pathian chungchâng thlîrna dik tak kan neih a ngai a. Hê bûin a sawi dânin, A rawng

kan bâwlsak Pathian chuan A thuneihna hmanga khawvêl hun inher thunun chauh ni lo vin, mamawh hun taka A mîte a tanpui tûra A mîte nunah zahngaihna nêh a lo che thîn a ni. Pathianin khâng Hebrai tlangvâl saltângte tâna A tihsak ang khân, tâwpna hun A mîte tân pawh, anmahni leh an rinna kawng hrang hranga beihna nasa hlê mah se, A la tihsak dâwn a ni tih kan la hmu zêl dâwn ni.

**Tûnah hian, pâwn lam aţang leh kohhran chhûng aţang emaw pawha i nungchanga tlin lohna denchhena rinna thûa chona i hmachhawn thenkhat chu engte nge ni? I hmâa thil lo thleng tûr apiangte hneh thei tûra sâwtpui tûrin, engtin nge Pathian thuneihna rinchhan dân i zir theih ang?**

**THAWHTANNÎ**  
**Nêkchêpna Kâra Rinna**

*January 6*

**Daniela 1 chhiar la. Hêng tlangvâlthe hian eng ti tûra nawrna nge an hmachhawn?**

Babulon an lo thlen vêleh hêng tlangvâl palîte hian an rinna leh chhia leh tha hriatna thûah chona lian ber mai an hmachhawn nghâl a; lal rawngbâwlsak tûra inzirna tha bik nei tûra tih an ni. Hmânlai lalte khân an sal mante zînga a tha ber ber thlan chuahte chu lal in vêlah an chhawr ţangkai thîn a; chutiangah chuan anmahni mantu lal leh an pathiante chung a rinawm tlat tûra ngaih an ni. Chutianga an tih chu an sâkhuaa piantharna leh an khawvêl thlîr dân thlâk tûra innawr luihna a ni ber mai. Chutiang atân chuan khân Hebrai tlangvâlthe pawh kha an hmingte thlâk a, hming tharte phuhsak an ni rêng a. Hming thar chuan neitu thar leh dam chhan thar an neihzia pawh a enfîr a ni.

Babulon mîte chuan chutianga hming thar puttîrna hmanga an chung a thuneihna lanfîr leh an Babulon nunphung leh thilte ngaihsânfîr tumin an nawrlui a. An hming pângngai, Israel Pathian hming châwi kha, ram dang mîte pathiante hming châwimâwinâa thlâksak an ni

a. Chû bâkah, lalber chuan amâ dawhkân kîlpuia siam pawh a tum ruh hlê bawk a. Lal chaw ei ang ei nihna khân hmânlai hunah chuan awmze thûk tak a nei a. Thinlung zawng zawnga lal chungarinawmna leh amâ zâra nung nihna a entîr. An eitûr chhawpte kha an lalram pathiante hnêna hlan hnûte a nih thîn avângin chutiang han ei pawh chuan an sâkhuana thilah awmze thûk tak a nei bawk a. Lalberin an pathian a biakna thil pawmpui leh tel vêna a ni.

Chutiang chuan, Daniela leh a thiante khân chona lian tak an hmachhawn mêk a ni tih an inhria a. Anmahni Pathian chungarinawm zêl chungar chû lalram tih dân phungin na taka a nawr chungar dam khawchhuak tûr chuan, thilmak a thlen a ngai. Chû chauh ni lo vin, khâ Babulon khawpui kha mihring thiltihtheihzia târlanna a la ni lehngghâl! Babulon mîte pathian biakna hmunte chu mihring thiamna chungchuâng hmanga dân niin, an huan inkhâi te leh khawpui chhûnga Eufrates Luipui luang lût ruih maite kha cho ruâl loh mihring ropui leh thiltihtheihzia lantîrna a ni.

Tichuan, Daniela leh a thiante chu kâisân theihna tûra remchânna pêk an ni a, chû chu an hlâwkpu leh hmuingîl theihna tûr pawh a ni. Chutiang a nih chuan Hebrai saltâng ni tawh lo vin, lal leh mi lian chhûngzînga mi an lo ni tawh bawk ang. Ropuina kawng awlsam chu zawh tûrin zirtîrna tluanghruite chu an thlah mai dâwn em ni ang le?

**Khâng tlangvâlthe khân an chhia leh tha hnûkhniama inremsiampui tûra thutlûkna siam tûrin eng tiang kawngtein nge chhuânlam an siam theih ang le? Eng tiang kawngtein nge chutiang zîrâng deuh chona verther zâwkthe chu tûnah in hmachhawn theih?**

**THAWHLEHNÎ  
Tumna Ruh Tak**

*January 7*

**Daniela 1:7–20 chhiar la. Heta thil pahnih kan hmuh chu: Danielan duhthlang thei tûra zalênna a neih leh Pathian lo**

## **chêtna a ni. Hetah hian eng zirfîrna thupui pawimawh tak nge awm bawk?**

Hebrai saltâng palîte khân an Babulon hmingte kha an hniâl âwmin a lang lêm lo. An zîngah tel an Hebrai hming hmang bâk kha chu an tân tih ngaihna a awm lo pawh a ni mahnâ! Mahse lalber dawhkâna an châw leh uain in thû-ah erawh kha chuan, khatiang ei leh in an kâa luhtîr loh chungchângah kha chuan an thû a ni vê tawh a. Chuvângin duhthlan theihna an neih kha tlangvâl palîte tân khân a pawimawh hlê rêng a ni.

Chuti chungin, officer pawhin an hmingte an thlâksak thei a nih chuan an ei tûrte pawh an tih danglamsak thei ngêi ang. Khâng tlangvâl palîten lal dawhkâna mi thil an ei duh loh chhan pahnih ni âwm chu:

Pakhatnaah, lal dawhkâna eitûr zîngah khân thil thianghlim lo (thiang lo) a tel a ni thei ang (*Leviticus 11*). Pahnihnaah, an châwte kha an pathian limte hmâa hlan hmasak an nih hnûin lal dawhkâna chhawp tûra thawn an ni thîn a. Chutiang chuan, Daniela khân bumna leh vervêkna tel lo, Chiang takin, sâkhuana thil vângin ngenna a siam a, a awmzia chu lal ina châw vêl chuan amah leh a thianté chu a tibawlhhlawh dâwn tihna a ni (*Daniela 1:8*), a huaisen thlâk thlâwt a ni.

Daniela leh Babulon hotu lian inbiakna kan enin, thil pawimawh tlêm a lo lang a. Pakhatna, Daniela khân khâ hotupa dinhmun khirh dân kha a hriat thiampui a, chuvâng chuan fiahna hun siamsak tûrin rawtna a thlen. Ni sâwm chhûng chuan thil dang an rin an thâtpui leh thâtpui loh a lang hman ang a, hotupâ tân pawh a hlauhawm lotuk lo thei ang. Pahnihna, chutiang hun rei lo te chhûng leka rah thâ a chhuah hman dâwn tih Daniela a chian ngamna chu Pathiana rinna a nghah pumhlûm hmiah vânga a ni. Pathumna, ei atâna thlâi leh in atâna tuisik thlan zâwkna khân Thilsiam laia mihringte tâna Pathianin châw a lo pêk kha a kâwk a (*Gen. 1:29*), Daniela khân chumi zâra thutlûkna siam

pawh a ni mai thei e. A thu hrimin, Pathianin a tîra min pêk âia ei tûr ða zâwk a awm thei chuâng dâwn em ni?

**Danielan duhthlang tûra zalênna a neih zâra Pathian lo chêtna tûr kawng a hawnah khân eng chu nge han pawimawh ta viau le? (Daniela 1:9)? Duhthlanna kan siam pawimawhzia chunghângah eng zirlaite nge heta ðang hian kan lâk chhuak theih ang? Thutlûkna kan siamahte hian Pathian kan rinchhanna hian eng awmzia nei tûr nge ni ang?**

NILÂINI

January 8

**Sawisêlbo leh Fing**

Nebukadnezzara din hnâ atâna an tlin dâwn vângin Daniela leh a ðiante kha lal rawngbâwl tûra thlan a ni. Lal duh dân angin, ‘hmêlhemna nei lo’ leh ‘hmêlðhâ tak’ (Daniela 1:4, NKJV) an ni. Thil ngaihnaawm tak chu, inthâwina thilte leh lal ina rawngbâwltûte kha ‘hmêlhemna nei lo’ an nih a ngai (Lev. 22:17–25; Lev. 21:16–24). Babylonian lal khân a lal ina rawngbâwl tûra khatiang sawisêlna awm lo a thlan khân, Israelte Pathian angah a inngai deuh pawh a ang a. A lehlamah, Daniela leh a ðiante khatiang an lo ni kher khân, anni kha Babulon lalrama chona an hmachhawn dânah khân Pathian tâna inthâwina nung an ni tih a kâwk pawh a ni mai thei e.

**Chhiar tûr: Galatia 2:19, 20; Matthaia 16:24–26; 2 Korin 4:17. Thlêmna eng pawh kan hmachhawnna kârah rinawm taka kan awm reng theihna tûr chungchâng eng thilte nge hêng chângte hian min hrilh?**

Hebrai saltângte rinawmna kha Pathianin a châwimâwi a, enfiahna hun ni sâwm a lo ral khân, anni kha lal dawhkân kîlpuitûte dangte âia hrisêl zâwk leh ei ða zâwk ei angin an lang tlat mai. Tichuan, Pathianin A chhiahhlawh palîte hnênah chuan “thiamna

leh finna zawng zawngah hriatna leh bengvârna a pê a, Daniela chuan inlârna leh mumang zawng zawng a hre thiam,” (*Daniela 1:17*, NKJV). Hê thilthlâwn pêk hian Danielan hrihl lâwk rawngbâwlna a neihna tûrah ãangkaina tak a la nei dâwn a ni.

Babulon rorêlna hmuna A chhiahhlawh rinna Pathianin a châwimâwi ang khân, keini pawhin khawvêl chonate kan hmachhawn laiin finna min pê a. Daniela leh a ãhiante nuntawng aãang khân, kan khawtlâng nun hlemhlê takah pawh bawlhhlawh kâi lo vin kan nung thei tih kan zir a. Pathian rawngbâwl tûr hian kan khawtlâng leh hnam nun lak aãangin kan inthiar fihlîm daih a ngai lo tih kan zir a. Daniela leh a ãhiante pawh kha, dâwt thû leh thil dik lo pui pui, thurûk zîngah an chêng chauh pawh ni lo vin, chutiang lam zirna sikula luhîr chu an ni hial zâwk a. Mahse, chutichung chuan an la rinawm ta cheu tho a ni.

**Khawi hmunah pawh chêngin, kan thurin leh zirtîrna anga rinawm harsat viauna khawtlâng leh hnam nun zînga kan khawsâ pawh a ni thei. A chhe zâwnga in khawtlâng nunin hû a neih dân hre reng chungin, hei hi mahni in zâwt teh: “*Eng ang taka ãhain nge chûng chu ka do lêt?*”**

NINGÂNÎ  
Final Exam

*January 9*

**Daniela 1:17–21 chhiar la. Tlangvâl palîte hlawhtlinna thurûk chu eng nge ni? (*En tel tûr: Joba 38:36; Thufingte 2:6; Jakoba 1:5.*)**

“Babylonian University-a” kum thuman zir hnûin, Hebrai tlangvâl palîte chu final exam nei tûrin lalber hmâah an ding a. Zirlai dangte âia hrisêl zâwk hmêlpû ni ngawt lo vin, hriatna leh finna lamah pawh anni chu an khûm Chiang hlê a ni. Tlângvâl palîte chu lal rawngbâwl tûra lâk nghâl an ni a. Kan theihngihl hauh loh tûr chu, hê “hriatna leh finna” tihah hian ringlo mîte thil

tam tak a tel ang tih chu rinhlelh ruâl a ni lo tih hi a ni. Chuti chungin, an zir tel vê vek tho va, an ring ve lêm lo tih mai lohah chuan, a thiam pawh an thiam phian mai tih a Chiang a ni.

Nebukadnezara kha chuan zirlai tlangvâl palîten khatiang taka an thiam theihna kha lal ina an ei leh in bâkah, an training program vângah a ngai pawh a ni mai thei e. Daniela leh a thiante erawh kha chuan, chutianga an tih thatna chhan kha chu Babulon zirna that vâng a ni lo tih an hre rân mai tih chu a thu kalhmang a tangin a lang a. Engkim hi Pathian laka chhuak a ni a. Amah rinchhantûte tâna Pathian thiltihtheihzia enfîrna thiltitheih tak a va ni êm! Pathian fâte kan nihna tichhia leh tiderthâwng thei hêng tûnlai thiamna te, sorkar te leh zirna hmunpuiin min hneh theihna hi kan hlâu ngawt tûr a ni lo. Pathiana rinna kan nghah tlat phawt chuan, hun harsâ kârah pawh min chelh dîng thei a ni tih hriain, thil buaithlâk kârah pawh chhelna min pe thei a. Kan rinna phatsan tûra chona kan hmachhawn huna thutlûkna dik siam thei tûra a châbi chu kan kutah a awm a ni.

*Daniela 1* kan enin, Pathian chungchâng thil pawimawh thenkhat kan zir thei a, chûngte chu: 1) Pathianin khawvêla thilthleng chungah thû a nei. 2) Kan hnam leh khawtlâng boruak tha lo kan paltlang theih nân Pathianin finna min pe thîn. 3) Mahnî thinlung chhûng leh nunphung rênga Amah rinchhantûte chu Pathianin a châwimâwi thîn.

Hê bung tih tâwpna thû chu, “Daniela chuan lal Kura kumkhatna thlengin a thawk ta zêl” (*Daniela 1:21*, NKJV) tih a ni. Heta lal Kura hming târlan hian pawimawhna tak a nei a: ram danga sala hruai nihna kârah beiseina a siamsak a ni. Kura kha Pathianin A mîte chhuah zalên a, Jerusalem lama kîr leh phalsaktu tûra a mi thlan a ni. A bung tîr lamah hneh leh sala hruai thû sawi mah se, a tâwpna erawh chu beiseina leh mahni ram lama kîr lehna thû a ni thung. Hei hi kan Pathian a ni a: kan nuna harsatna khirh ber lo thlen lai pawhin, beiseina tukverh min hawnsak a, chû chu tawrhna leh natna piah lama ropuina leh hlimna kan thlîr lâwk theih nân a ni.



**Ngaihtuah Zui Tûr:** “Babulona Daniela leh a ðiante kha an vânglai hun hmang mêk, Aigupta rama Josefâ hun hmasa lam dinhmun âia remchâna duhawm zâwk nei a ni a; chuti chungin, nungchang lama fiahna an paltlang erawh chu a nêp chuâng hauh lo. An tlangvâl chhuah tih lai vêla Judai ram khawsakna tluangtlam tak aţangin khatih laia khawvêl khawpui ropui bera hruai niin, chuta rorêltû rorêlna hmunah, lal rawngbâwltu bîk ni tûra zir tûra thur chhuah an ni. Chû rorêlna hmun anmahni hual vêltu nawmchenna leh hlemhlêtna thlêmnate chu a chak êm êm a. Dik tak chuan, anni Jehova betûte kha Babulona saltâng an ni a; an Pathian ina bungbêl thianghlimte pawh Babulon mîte pathian biakna tempul-ah dah a ni a; Israel lal ngêi pawh Babulon mîte kuta mi tâng a ni. Anmahni hnehtute chuan Hebrai hote sâkhua leh hnam nun âi chuan anni sakhua leh hnam nun chu a chungnung zâwk tiin an uânkhum a. Chutiang hnuaiah chuan, A thupêkte Israelten an hawisan avânga tihtlâwm an nihna aţang ngêi chuan, Pathianin A thilngiat thianghlim leh thuâwina rah chhuah chu a chungnung zâwk a ni tih Babulon-ah finfiahna a pê a. Hetiang hriattîrna thû hi Amâ chung a rinawm tlatte hmang chauha pêk thei a ni ðîn.”—Ellen G. White, *Education*, p. 54.

### Sawi Ho Tûrte:

- ❶ **In class-ah, Kristian in nih vânga in khawtlâng leh hnam nun avânga chona in hmachhawn ðinte chu sawi ula. Chûng chu engte nge ni a, engtin nge kohhran in nihna ang khân hmâ in lâk theih ang?**
- ❷ **Daniela leh a ðiante tâna an rinna hnuhhniam a awl dân tûr chungchâng kha ngaihtuah ula. Babulon mîte lah kha hmêlmâ, anmahni hnehtu kha an ni sî a. Judate kha hneh an ni a. Daniela leh a ðianten an pawm theihna tûrin, Israelte Pathian âia Babulon mîte pathiante ropui zâwkzia eng ‘finfiahna’ dangte nge awm thei ang? Chutiang harsatna hnuaiah chuan chhel taka an tuâr fan fan theih nân, eng**

**Bible thutakte nge han pawimawh zuâl deuh ang? (*Jeremia 5:19; 7:22–34.*) Hei hian kan Bible thû kan hriat a, ‘tûnlai thudik’ kan man thiam pawimawhzia eng nge min zirtîr tûr ni ang?**

**③ Engati nge rinawmna hi a pawimawh viau? Keimahnî tân chauh pawh ni lo, rawng bâwlsak dân kawng kan zawnsak mêkten LALPÂ nungchang an lo hriat theih nân pawh?**